

PEMBERITAHUAN PERTANYAAN DEWAN RAKYAT

PERTANYAAN : BUKAN JAWAB LISAN
DARIPADA : DATO' SRI HASAN BIN MALEK
SOALAN : NO. 9

Dato' Sri Hasan bin Malek [Kuala Pilah] minta **MENTERI PENDIDIKAN TINGGI** menyatakan sejauh manakah pihak MARA bercadang untuk memperkasakan kampus induk UiTM Negeri Sembilan di Kuala Pilah terutamanya dari segi prasarana, jumlah pelajar dan jumlah bidang pengajian yang ditawarkan atau adakah pendirian kampus induk ini hanya sekadar satu syarat pewujudan UiTM sebenarnya.

JAWAPAN

Tuan Yang di-Pertua,

Untuk makluman Ahli Yang Berhormat, UiTM adalah di bawah pentadbiran Kementerian Pendidikan Tinggi (KPT) dan bukannya MARA. KPT sentiasa membuat perancangan yang teliti dalam menyediakan pelan pembangunan sesuatu projek dan setiap projek pembangunan akan memberi nilai tambah untuk penduduk di kawasan tersebut.

Projek UiTM Kuala Pilah adalah projek RMK-9 yang telah direka untuk menampung kapasiti 2,000 orang pelajar dengan kapasiti asrama juga untuk seramai 2,000 orang pelajar. Pada masa sekarang terdapat 1,692 orang pelajar yang mendaftar dalam program-program pengajian peringkat Pra Diploma, Diploma dan Ijazah Sarjana Muda. Ini bermakna prasarana yang ada masih mampu untuk menampung jumlah pelajar dan bidang pengajian yang ditawarkan. Adalah diunjurkan jumlah pelajar di UiTM Kuala Pilah akan mencecah 2,815 orang pada tahun 2020. Unjuran secara konsisten dibuat pada setiap tahun setelah mengambil kira semua faktor kritikal.

Secara dasarnya, pengambilan dan penempatan pelajar dibuat dengan pertimbangan keutamaan yang khusus yang memberatkan soal-soal agenda nasional dan bangsa serta masa depan graduan.

Setakat ini, semua program yang ditadbir di kampus UiTM Negeri Sembilan adalah berteraskan Sains Gunaan.

Dalam perancangan terdekat, penawaran program baharu yang berdaya saing dan memenuhi kehendak industri akan dilakukan, dan ini melibatkan sekurang-kurangnya 1 program baharu dalam tempoh 5 tahun. Sehingga tahun 2020, UiTM Kampus Kuala Pilah menjangkakan akan menambah/membawa beberapa program baharu yang semuanya dalam proses penyiapan, yang meliputi antaranya:

- a) Diploma Pengurusan Halal;
- b) Degree in Food Technology; dan
- c) Degree of Physics Materials and Energy Technology.

Untuk makluman Ahli Yang Berhormat, UiTM Negeri Sembilan komited dengan soal-soal pembangunan secara holistik. Keutamaan yang diberikan kepada setiap komponen pembangunan – samada pembangunan akademik, kemanusiaan, tempatan dan nasional dan sebagainya – dibuat dengan mengambil kira dasar-dasar yang sudah dikaji dan digubal secara komprehensif sepertimana disediakan di peringkat pusat dan diperhalusi di peringkat negeri atau tempatan.

UiTM Negeri Sembilan sentiasa memastikan setiap langkah dan tindakan yang dibuat dalam usaha membangunkan pendidikan tinggi anak bangsa sejajar dan selari dengan pelan pembangunan negeri di mana relevan menurut konteks dan kesesuaiannya. Komitmen ini akan tetap diteruskan dengan sepenuh sokongan dan kepimpinan terbaik UiTM Pusat yang diketuai YBhg Dato' Naib Canselor.

Kesimpulannya, UiTM Negeri Sembilan, sepertimana semua kampus UiTM lain, merupakan institusi yang sentiasa peka dan komited dengan tanggungjawab besar bukan sahaja sebagai pelindung atau benteng pembangunan anak bangsa, malahan melakar dan mencorak destini anak bangsa supaya dapat memberi makna yang besar kepada negara dan bangsa serta terbilang membela kesejahteraan rakyat umumnya. Inilah sifat 'soaring upwards' yang dijadikan tonggak dalam segala perilaku pembangunan UiTM.